

برنامج " برعاية..!!"

مساء الخير..البرنامج النهاردة هيكون برعاية " حزب الكنية"

اللي مايعرفش حزب الكنية ده حزب اصيل متأصل من زمان اوي، ممكن نقول من ساعة ما بقي فيه بني آدمين علي الكوكب، مميزات الحزب ده المطالبة بالتغيير الي الافضل، الصوت العالي من أجل السلام، الجدل ثم الجدل ثم الجدل لاحد مانقوم نمسك في شعور بعض من أجل الوصول الي افضل الحلول..

وبم اني بكتبلكوا الخطاب اللي هيغير البشرية من علي الكنية، فالقليل من الأفلاطونية علي شوية اتهامات نهدفها علي الناس والمجتمع والحياء كلها لابد منها برده..

طبعاً هتفتكروا اني بتكلم عن اللهم أحفظنا " السياسة وكدة" ، بس احب اقولك عزيزي المستمع انه أطلاقا..

انا بتكلم عن الحزب اللي زعيمه والممول الأساسي له صاحب مقولة " كشريلي البرتقانة"

ونائب زعيم الحزب اللي بينظم الحقوق والواجبات وبيوزع التمويل علي باقي افراد الحزب صاحب مقولة " انا هطفش من البيت ده ومش هتعرفولي طريق جرة"

وشباب الحزب الأصيل اصحاب مقولة ، اغسليلي امسحيلي هاتيلي، وديني وجبيني، وماتنسيش بالمره تحميني..

حزب متماسك لأبعد حد امام باقي الاحزاب الكنية الأخرى ولكنه في الحقيقة هو حزب متلخخ متزعزع، متفكك، كل فرد فيه بيلقي اتهامات علي الآخر انه هو السبب في سوء الاحوال الشخصية والنفسية والأقتصادية ، ولكنها اتهامات تصب في مصلحة المواطن الكنباوي، وبعدها تكبير دايرة الاتهامات لتشمل باقي افراد الاحزاب الكنية الأخرى ولقي بينا يا دنيا بقي..وطبعاً كل ده بيصب في مصلحة المواطن للتغيير للأفضل..الصب شئ مهم برده.

عزيزي المستمع اذا اردت الانضمام لحزب الكنية نرجو منك التخلي عن اي افعال جدية من شأنها تغيير الواقع الحقيقي، والتنحي تماما ونهائيا عن اي واجبات تربوية واقتصادية واجتماعية، عليك الاحتفاظ بقاموس اللعنت والشتم الراقى لأستخدامها في الأوقات المناسبة..ولا تنسي دورة التبريرات الفارغة التي تستساعدك في تخطي اي موقف مش علي مزاجك... للأنضمام لحزب الكنية راسلونا او تواصلوا معنا من خلال الصفحة..الي اللقاء